

## Projekat "Lokalni ekološki akcioni plan za održivost u Jugoistočnoj Evropi"

### ODABRANI PRIORITETNI PROJEKTI IZ LEAP-a

- **Revitalizacija malih sportskih terena, Općina Novi Travnik.**

Na temelju Odluke Općinskog vijeća Novi Travnik o usvajanju Lokalnog ekološkog akcionog plana za Općinu Novi Travnik, donesene na 7. redovnoj sjednici održanoj 01.10.2009. godine i Liste prioriternih projekata iz oblasti okoliša elaboriranih u samom dokumentu, predloženo je da prvi projekt koji će se implementirati bude revitalizacija malih sportskih terena lociranih uz samo središte grada Novog Travnika.

Projekat je odabran cijeneći pokazatelje kao što su: finansijska sredstva, efikasnost, održivost, vidljivost, vrijeme implementacije i opći značaj za sve građane Novog Travnika.

Projekat revitalizacije malih sportskih terena omogućit će svim građanima, kako rekreativno, tako i profesionalno bavljenje rukometom, košarkom, odbojkom na pijesku, malim nogometom, tenisom, trčanjem i gimnastikom, a otvorit će dodatni prostor i za predškolsku djecu.

Općinsko vijeće Novi Travnik je na 9. sjednici održanoj 30.12.2009. godine podržalo prijedlog prioriternog projekta i donijelo Odluku o implementaciji navedenog prioriternog projekta.

#### Kratak opis projekta

Mali sportski tereni nalaze se u neposrednoj blizini središta grada, u produžetku sportskog kompleksa koji čini gradska sportska dvorana (sa oko 3.000 mjesta i uvjetima za sve dvoranske sportove) i otvoreni olimpijski bazen dimenzija 50x23 m, te kuglana, koju je potrebno obnoviti.

Cijelom dužinom prostora protiče rijeka Jaglenica uz koju je moguće uraditi staze za šetanje, a u okviru obnovljenih malih sportskih terena i trim stazu.

Sa zapadne strane terena nalazi se Dom zdravlja, a sa sjeverne strane kompleks stambenih zgrada.

U prvoj fazi projekta, mali sportski tereni bi se ogradili, očistila bi se izrasla trava i korov, obnovila rasvjeta nad svim planiranim terenima i očistilo bi se korito rijeke Jaglenice. U narednim fazama, poboljšala bi se kvaliteta podloge na terenima, natkrilo malo nogometno igralište, asfaltirao parking, uredio prostor za predškolsku djecu i dr.

Revitalizacijom malih sportskih terena ostvarila bi se višestruka korist kao što je:

- očistilo bi se korito rijeke Jaglenice u gradskoj zoni,
- uklonila bi se divlja tržnica koja je trenutno smještena na prostorima malih sportskih terena,
- očistio bi se prilaz Domu zdravlja i stambenim zgradama,
- uljepšao bi se izgled središnjeg dijela grada,
- građani Novog Travnika dobili bi potrebne prostore na otvorenom za rekreativni sport,
- mladim ljudima pružio bi se dodatni sadržaj gdje bi kroz pojedinačni i kolektivni sport kvalitetno ispunjavali svoje slobodno vrijeme,
- sportski klubovi imali bi mogućnost treniranja po ekonomski prihvatljivim cijenama iznajmljivanja termina,
- školama bi se ponudio prostor za organiziranje međuškolskih natjecanja,

- opća kvaliteta života u gradu bila bi dignuta na viši stupanj.
- **Zaštita i uređenje kupališta «Bjeline» Opština Kotor Varoš.**

Na sjednici održanoj 29.12.2009. godine Skupština opštine Kotor Varoš je donijela Odluku da prvi projekat koji će se implementirati i finansirati iz LEAPa bude zaštita i uređenje kupališta „Bjeline“.

#### Kratak opis projekta

Kupalište Bjeline se nalazi na obalama rijeke Vrbanje na udaljenosti 500 m od samog centra grada. Na kupalištu je u jednom dijelu izgrađena gradska plaža, igralište za odbojku u pijesku, stolovi i klupe, te kao takvo ne zadovoljava potrebe građana u smislu kapaciteta ni kvaliteta sportsko-rekreacionih sadržaja. Problem kupališta Bjeline koji je prisutan godinama, a koji bi se riješio implementacijom ovog projekta, je izlivanje rijeke Vrbanje i plavljenje kupališta. Realizacijom ovog projekta stvorili bi se uslovi za poboljšanje kvaliteta života u sportsko-rekreacionom, kulturnom i turističkom smislu za građane Kotor Varoša i šire. Projektom je predviđeno da se kupalište i okolno područje izgradnjom jarmovskih brana, obaloutvrde i zaštitnog nasipa zaštiti od poplava. Također, planirana je i izgradnja igrališta. Na ovaj način bi se obezbijedili kvalitetniji uslovi za upražnjavanje sportsko-rekreacionih i drugih društvenih potreba stanovništva.

- **Izgradnja kanalizacionog kolektora za naselje Volijak, Općina Jajce.**

Na osnovu Odluke Općinskog vijeća Jajce o usvajanju Lokalnog ekološkog akcionog plana za Općinu Jajce, donesene na 9. redovnoj sjednici održanoj 28.01.2010. godine, te liste prioritetnih projekata iz oblasti okoliša navedenih u akcionom planu samog dokumenta, predloženo je da prvi projekat koji će se implementirati iz LEAP-a bude izgradnja kanalizacionog kolektora za naselje Volijak.

Projekat izgradnje kanalizacionog kolektora za naselje Volijak je odabran iz razloga što se njegovom implementacijom rješava jedan od najvećih problema u gusto naseljenom gradskom području. Analizom pokazatelja, kao što su: finansijska sredstva, efikasnost, vidljivost, vrijeme implementacije i opći značaj projekta za građane, zaključeno je da navedeni projekat predstavlja prioritet za implementaciju.

Općinsko vijeće Općine Jajce je također prepoznalo značaj realizacije projekta, te je na 9. redovnoj sjednici održanoj 28.01.2010. godine usvojilo i donijelo Odluku o davanju saglasnosti za realizaciju i sufinansiranje pomenutog projekta.

#### Kratak opis projekta

Neriješeno pitanje odvoda otpadnih voda značajan je problem sa kojim se suočavaju građani Jajca. Oko 40% domaćinstava na području Općine nema priključak na kanalizacionu mrežu, te se u tim naseljima koriste septičke jame koje su većinom neadekvatno izgrađene i uzrokuju pojavu klizišta. U nekim područjima otpadne vode otvoreno teku ulicama, što je posebno izraženo u naselju Volijak.

U okviru projekta, izgradila bi se kanalizaciona mreža u naselju Volijak (obuhvata prostor od 26,6 ha sa približno 4.150 stanovnika) u dužini od 2000 m. Kanalizacija naselja Volijak bi se kolektorom uvela u glavni kolektor promjera 1.000 mm kod Zulića potoka.

Izgradnjom kanalizacionog kolektora u naselju Volijak ostvarila bi se višestruka korist:

- riješilo bi se pitanje odvodnje otpadnih voda iz gradskog naselja,
  - prestala bi upotreba brojnih septičkih jama koje su uglavnom nepropisno izgrađene,
  - smanjila bi se opasnost od klizišta,
  - poboljšali bi se sanitarno-higijenski uslovi života stanovnika naselja Volijak,
  - smanjila bi se opasnost od zaraznih bolesti posebno kod učenika Srednje strukovne škole i učenika Osnovne škole „13 rujan“ koje su smještene u ovom dijelu grada,
  - opšti kvalitet života u gradu bi bio na većem stepenu.
- Oaza čistog vazduha, rekreacije i zdravlja, **Opština Prnjavor.**

Na sjednici održanoj 29.12.2009. godine Skupština opštine Prnjavor je donijela Odluku da prvi projekat koji će se implementirati iz LEAP-a bude uređenje sportsko-rekreativnog centra „Borik“.

Razlog odabira pomenutog projekta jeste što opština Prnjavor nema adekvatno mjesto koje se može okarakterisati kao uređeno izletišta, rekreativni centar sa trim stazama za pješaćenje, trčanje i vožnju biciklom. Pored toga što pruža uslove za rekreativni i sportski sadržaj, zahvaljujući čistom i svježem vazduhu, Borik je izuzetno značajan i u očuvanju zdravlja stanovništva.

#### Kratak opis projekta

Sportsko-rekreativni centar „Borik“ nalazi se na udaljenosti 2 km od samog centra grada. Obuhvata površinu od 38,50 hektara i veći dio je pod šumskim kompleksom.

U okviru projekta planirano je uređenje trim staza za šetnju, trčanje i vožnju biciklom, postavljanje klupa i drvenih kućica za odmor, izgradnja vidikovca i osmatračnice od drveta, postavljanje korpi i kontejnera za smeće, postavljanje rasvjete, uređenje javne česme, uređenje parka za djecu i uređenje tribine-amfiteatra.

Implementacijom projekta stvorili bi se bolji uslovi za kvalitetniju i raznovrsniju ponudu ne samo građanima opštine Prnjavor, već i posjetiocima i turistima. Opština će dobiti „oazu mira“ sa naglašenim ekološkim karakteristikama s jedne, neposrednom blizinom urbane zone i kompletnom turističkom infrastrukturom s druge strane.

- Uređenje gradskog područja i Izrada potrebnih dokumenata za pokretanje inicijative za proglašenje dijela planine Zvijezda zaštićenim pejzažom, **Općina Vareš.**

Općinsko vijeće Vareš je na 15. sjednici održanoj 03.02.2010. godine donijelo Odluku da prvi projekti koji će se implementirati iz LEAP-a budu uređenje gradskog područja i izrada potrebnih dokumenata za pokretanje inicijative za proglašenje dijela planine Zvijezda zaštićenim pejzažom.

#### Kratak opis projekta uređenja gradskog područja

Grad Vareš je smješten u uskoj kotlini kojom protiče rijeka Stavnja, čije je korito većim dijelom urađeno prije 40 godina, kombinacijom kamenih i betonskih zidova. Dno korita je kroz centar grada popločano kamenom. Kućni otpad se skuplja u kontejnere koji su locirani po cijelom gradu i često se premještaju sa jednog na drugo mjesto. U gradu se nalaze parkovske površine koje su dosta neuređene. Zbog samog položaja Vareša, izražen je problem nedostatka potrebnog broja parking mjesta čije je jedino rješenje pokrivanje dijela korita rijeke Stavnje.

U okviru projekta planirano je čišćenje i uređenje korita rijeke Stavnje, uređenje prostora za smještaj kontejnera (niše za kontejnere), uređenje zelenih površina i postavljanje klupa i priprema projektna dokumentacije za pokrivanje dijela korita rijeke Stavnje.

Implementacijom projekta poboljšao bi se imidž grada i povećalo zadovoljstvo stanovnika Vareša kvalitetom života.

Kratak opis projekta izrade potrebnih dokumenata za pokretanje inicijative za proglašenje dijela planine Zvijezda zaštićenim pejzažom

Sjeverno od Vareša nalazi se planina Zvijezda koja obiluje prirodnim ljepotama, spomenicima prirode i specijalnim botaničkim rezervatom sa rijetkim biljkama.

U svrhu zaštite ovog područja, u okviru projekta će se izraditi potrebna dokumentacija za pokretanje inicijative za proglašenje dijela planine Zvijezda zaštićenim pejzažom koja će se uputiti Ministarstvu za prostorno uređenje, promet i komunikacije i zaštitu okoline Zeničko-dobojskog kantona koje je nadležno za dalje aktivnosti na proglašenju nekog područja zaštićenim pejzažom.

Realizacijom projekta stvorili bi se uslovi za dalje aktivnosti po pitanju zaštite planine Zvijezda.